

SHAH ALAM, Khamis — Datuk Seri Dr. Mahathir Mohamad hari ini mengingatkan pengusaha-pengusaha Bumiputera, jangan terlalu gopoh ingin menjadi 'tuan' dalam sesuatu perniagaan.

Sebaliknya kata Perdana Menteri, bekerja dengan orang lain walau dari apa bangsa sekalipun adalah tidak hina asalkan pekerjaan itu boleh mendatangkan pengalaman yang berguna.

Beliau yakin, bekerja dengan perusahaan milik orang lain adalah satu jalan dan panduan bagi memudahkan mereka mengetahui selok belok perusahaan yang bakal ditubuhkan kelak.

Berucap merasmikan Pusat Teknologi Perindustrian Logam (MITEC) di sini, Datuk Seri Dr. Mahathir berkata, Bumiputera harus sanggup menghadapi cabaran bekerja dalam perindustrian logam.

Penentu

"Ini adalah faktor yang akan menentukan maju mundurnya mereka di bidang perusahaan," jelasnya.

Di samping itu Perdana Menteri mengingatkan, peserta Bumiputera yang mengikuti kursus di MITEC bahawa kursus yang diterima itu tidak bermakna mereka boleh membuka perusahaan sendiri.

"Ini disebabkan perusahaan sendiri memerlukan kecekapan pengurusan, modal dan sebagainya," kata beliau.

Mengenai penubuhan MITEC pula, Datuk Seri Dr. Mahathir berharap penggunaan bahan-bahan mentah tempatan dalam perindustrian ditingkatkan lagi dan peluang pekerjaan bagi pekerja-pekerja mahir diperluaskan.

"Kita juga berharap

Jangan gopoh nak jadi kaya: Dr. M

MITEC dapat menumpukan usaha mempergiatkan pemindahan teknologi di bidang perlogaman kepada usahawan-usahawan Bumiputera terutama pengusaha kecil yang mengeluarkan barang-barang tradisional," jelasnya.

Menurut beliau, kajian-kajian mengenai perindustrian logam di negara ini menunjukkan taraf teknologi bagi sektor ini adalah rendah dan kemampuan pengeluarannya terhad.

"Kebanyakan firma Bumiputera yang wujud hanya tertumpu kepada kerja-kerja kimpalan mengeluarkan pintu besi dan tangki air saja.

Perusahaan mengeluarkan barang-barang yang lebih besar seperti lapangan acuan dan kerja-tekan tidak ada," katanya.

Beliau berkata, penyertaan dan kemajuan pengusaha Bumiputera di bidang-bidang baru ini perlu digalakkan sejajar dengan kehendak Dasar Ekonomi Baru.

Bahan asal dari Arkib
Negara Malaysia